

官常典第三百五十四卷

都察院部名臣列傳十六

明二 耿九疇

按明外史本傳九疇字禹範廬氏人永樂末進士宣德六年授禮科給獄無所撓屈禮部侍郎章瑾統初大臣言兩淮鹽政久壞宜得重名檢者治之於是推薦爲鹽運司刑部不公九疇遂劾盛等且事著爲令母喪去官場民數千人詣闕乞留乃起爲都轉運使節儉無他好退焚香讀書廉聲益振婦孺皆知其名以事見誣逮下吏已得白卽留爲刑部右侍郎屢辨疑獄無所撓屈禮部侍郎章瑾下獄九疇等議貶其官瑾婿給事中王鉉銜之與同官葉盛張固等論刑部不公九疇遂劾盛等且言鉉父永和死土木而鉉嬉笑自如不宜居職帝置鉉等不問瑾如奏鳳陽歲凶盜且起勅往巡視奏留英武飛熊諸衛軍耕守招來流民七萬戶境內以安自九疇去鹽政復弛景泰元年仍命兼理尋勅錄諸府重囚平反多所釋旋兼撫江北諸府代還改撫陝西都指揮楊得青等私役操卒九疇劾之詔按治且命諸邊如得青者具劾以聞邊將請增臨洮諸衛戍九疇言邊城士卒非乏將帥能

嚴紀律賞罰明信則人人自奮不然徒冗食耳乃不增戍邊民春夏出作田秋冬輒徙入塞九疇言邊將所以禦寇衛民也今使民避寇失業安用將帥因禁民入徙有被寇者治守帥罪四年布政使許資言侍郎出鎮與巡按御史不相統事多拘滯請改授憲職便乃轉右副都御史大臣鎮守巡撫皆授都御史自九疇始有旨市羊角爲燈九疇引宋蘇軾諫神宗買浙燈事事乃寢災異求言請帝延儒碩公賞罰擇守令簡將帥優詔報焉天順初議事京師帝顧侍臣曰九疇廉正人也留爲右都御史罪人繫都察院獄者不給米九疇爲言乃日給一升遂爲令已陳時弊五事帝皆嘉納未幾御史張鵬等劾石亨曹吉祥亨等謂九疇實使之遂并下獄謫江西右布政使尋調四川明年禮部缺尙書帝問李賢賢曰老成清介無如九疇乃召還既至憐其老改南京刑部尙書四年卒諡清惠

軒輓

按明外史本傳輓字惟行鹿邑人永樂末年進士授行人司副宣德六年用薦改御史巡按福建劾蠹鋤奸風采甚峻憂歸起復清軍浙江劾不職官四十餘人還朝言祖宗設御史官爲職綦重今內外諸司有事多擅遣御史非憲綱也請禁之立報可正統五年超擢浙江按察使前使奢汰輓力矯

之寒暑一青布袍補綴殆遍居常蔬食妻子親操井臼與僚屬約三日出俸錢市肉不得過一觔僚屬多不能堪故舊至食惟一豆或具雞黍則人驚以爲異時鎮守監丞阮隨布政孫原貞杭州知府陳復仁和知縣許僕居官皆廉一方大治溫處有銀場永樂間增額至八萬二千兩帝卽位罷之至是參政俞士悅請復開謂利歸於上則礦盜自絕下三司議輓等力持不可乃止旣而給事中陳傅復請朝廷遽從之遂致葉宗留之變會稽趙伯泰宋苗裔也奏孝宗理宗及福王陵墓俱爲豪民侵奪御史王琳謂福王降於元北去山陰安得墓輓言福王蓋衣冠之藏伯泰言非誣乃成豪民於邊停琳等俸遭親喪起復奏陳四事俱切時弊帝悉從之景帝立以右副都御史巡撫浙江景泰元年命兼理兩浙鹽課閩賊吳金八等流劫青田諸縣輓與原貞討平之賊首羅丕廖寧八復自閩抵浙輓等防遏有功進秩一等改督南京糧儲復改左副都御史掌南院事天順元年召拜刑部尙書居數月引疾乞歸帝召見問曰昔浙江廉使考滿歸行李僅一簞乃卿耶輓頓首謝遂賜白金慰遣之南京督理糧儲缺帝問李賢大臣中誰曾居此職者賢以輓對且亟稱其廉乃命爲左都御史以往八年夏以老乞骸骨不待報徑歸抵家趣具浴欠伸而卒輓孤峭遇人無賢否拒不與接爲按察使

嘗飲同僚家歸撫其腹曰此中有臧物也在南都都御史張純置酒延客輒惡其汰不往徹饌遺之亦不納歲時詣禮部拜表慶賀屏居一室撤燭端坐事竣竟歸未嘗與僚友一語僚友聞其來亦輒避去不樂與之處量頗褊隘御史有訐人陰私者輒獎其能嘗令御史劾南京祭酒吳節節亦發輒私事眾頗不直輒然清操聞天下與耿九疇齊名語廉吏必曰軒耿

涂棐

按明外史羅倫傳御史涂棐豐城人天順四年進士成化中嘗言祖宗朝政事必與大臣面議自先帝幼冲未能裁決柄國者慮其缺遺假簡易之辭以便宣布凡視朝奏事諭旨輒曰所司知之此一時權宜非可循爲定例況批答多叅以中官內閣或不與尤乖祖制復乞面議杜蔽壅之弊憲宗不能用終廣東副使

伍驥

按明外史本傳驥字德良安福人景泰五年進士授御史莊重寡言笑見義敢爲天順七年巡按福建先是上杭賊起都指揮僉事丁泉汶上人善捍禦賊屢攻城皆爲所却已而賊轉熾驥入境之聞

立馳入汀州調援兵四集驥單騎詣賊壘賊不意御史猝至皆擐甲露刃驥從容立馬諭以禍福賊見其至誠感悟泣下歸附者千七百餘戶給以牛種俾復故業惟賊首李宗政負固不服遂與泉深入破之泉力戰爲賊所害驥弔死恤傷激以忠義復與賊戰連破十八砦俘斬八百餘人四境悉平而驥冒瘴癘成疾班師至上杭卒軍民哀之如父母旦夕臨者數千人爭出財立祠成化中以知縣蕭宏請詔與泉並祠賜祠名褒忠

楊瑄

子源

按明外史本傳瑄字廷獻豐城人景泰五年進士授御史剛直尙氣節景帝不豫廷臣請建東宮帝不允瑄與同官錢璫樊英等約以去就爭會奪門事起乃已天順初印馬畿內至河間民遮訴曹吉祥石亨奪其田瑄以聞并列二人怙寵專權狀帝語閣臣李賢徐有貞曰真御史也遂遣官往覆而令吏部識瑄名將擢用吉祥聞而大懼訴於帝請罪之不許未幾亨西征還適彗星見十三道掌道御史張鵬盛頤周斌費廣張寬王鑑趙文博彭烈張奎李人儀邵銅鄭冕陶復及御史劉泰魏翰康驥將劾亨吉祥諸違法事給事中王鉉聞之洩於亨亨乃先與吉祥泣訴於帝誣鵬等爲已誅內官

張永從子結黨排陷欲爲報讎明日疏入帝大怒遂收鵬及瑄御文華殿悉召諸御史擲彈章俾自讀斌且讀且對神色自若至冒功濫職帝詰之曰彼率將士迎駕朝廷論功行賞何冒何濫斌曰此輩皆貪天功當時迎駕止數百人光祿賜酒饌名數具在今超遷至數千人非冒濫而何帝默然竟下瑄鵬及諸御史於獄榜掠備至且詰主使者瑄等無所引乃坐都御史耿九疇羅綺主謀亦下獄論瑄鵬死餘遣戍亨等復譖諸言官帝諭吏部給事御史年踰三十者留之餘悉調外尙書王朝列上給事中何玘等十三人御史吳禎等二十三人詔以玘等爲州判官禎等爲知縣會大風震雷拔木發屋須臾雨雪正陽門下馬牌飛擲郊外而亨吉祥家大木俱折雪尤甚二人亦懼掌欽天監禮部侍郎湯序本亨黨亦言上天示警宜恤刑獄於是帝感悟戍瑄鵬鐵嶺餘止貶知縣秦翰驥三人復職而玘禎等亦得無調瑄鵬行半道適承天門災肆赦放還或謂當詣亨吉祥謝二人卒不往復謫戍南丹憲宗卽位並還故官瑄尋遷江浙副使杭州衛指揮陳鼎父子肆虐捕罪之按行海道禁將校私縱戍卒立操法修定海及霽衢健跳二所捍海塘築海鹽堤岸二千三百丈民得莫居爲副使十餘年政績卓然進按察使西湖水舊可溉諸縣四十六萬頃時堙塞過半瑄請浚之設防置牐

以利灌溉功未就卒海鹽人祠祀之子源字本清曉天文授五官監候正德元年劉瑾等亂政上言自八月初大角及心宿中星動搖不止大角天王之坐心宿中星天王正位也宜安而靜今乃動搖其占曰人主不安國有憂意者陛下輕舉逸遊弋獵無度以致然也又北斗第二第三第四星明滅於常第二曰天璇法星后妃之象后妃不得其寵則不明廣營宮室妄鑿山林則不明第三曰天機令星不愛百姓驟興征徭則不明第四曰天權伐星號令不當則不明伏希陛下祇畏天戒安居深宮絕嬉戲禁遊畋罷騎射停工作申嚴號令毋輕出入抑遠寵倖裁節賜予親元老大臣日講習詩書以弭災變疏下禮部尙書張昇等稱源忠愛報聞迨十月霾霧時作源言此衆邪之氣陰冒於陽臣欺其君小人擅權下將叛上引譬甚切瑾怒矯旨杖三十釋之又上言自正德二年來占得火星入太微垣帝座前或東或西往來不一乞收攬政柄思患預防蓋專指瑾也瑾大怒召而叱之曰若何官亦學爲忠臣源厲聲曰官大小異忠一也矯旨又杖六十謫戍肅州行至河陽驛以創卒其妻斬蘆荻覆之葬驛後楊氏父子以忠諫名天下爲士論重而源小臣抗節尤人所難萬曆中廷臣累請易名熹宗卽位賜諡忠懷

盛顥 周斌 王鑑 趙文博 彭烈 李人儀 邵銅 鄭冕

按明外史楊瑄傳盛顥字時望無錫人斌字國用昌黎人皆景泰二年進士鑑太原人文博代州人烈峽江人人儀隆昌人銅閭縣人冕樂平人皆進士授御史顥降東鹿知縣斌江陰鑑膚施文博淳化烈江浦人儀襄陽銅博羅冕衡山並有善政東鹿徭役苦不均顥爲立九則法繼者莫能易母憂去服除民相率詣闕乞還顥再任益不用鞭扑訟者諭之輒叩頭不復辯鄰邑訟不決亦皆赴析片言折之各心厭去郊外有隙地爭來築室居之遂成市因號清官店斌有德於江陰民歌曰旱爲災周公禱甘露來水爲患周公禱陰雨散天順七年斌先以薦擢開封知府而顥等至憲宗嗣位所司始以治行聞帝曰諸臣直諫爲權倖所排又善於其職其悉予郡於是擢顥邵武知府鑑延安文博衛輝烈河南人儀荊州銅溫州冕衡州顥復以任治劇調延平民皆愛之巡按御史上顥政績而陝西湖廣守臣亦上鑑人儀居縣時治行皆特賜封誥顥累遷陝西左布政使時三邊多警歲復洊饑顥善經畫餽餉無缺軍民悉安成化十七年召爲刑部右侍郎居二年調南京未赴會山東旱饑盜起改左副都御史往巡撫甫至露禱於天大雨沾漑稿禾復蘇乃舉救荒之政旣賑餘粟尙百餘萬

石又推行九則法於諸府黜暴除苛民翕然歸之居三年以老致仕弘治中卒斌歷廣東右布政使初去江陰民立生祠及自開封遷去民亦涕泣追送焉鑑初爲御史嘗於左順門面斥中官非禮中官怒甚會有詔考察御史因屬都御史蕭維禎去之維禎不可而止文博終巡撫河南右副都御史烈廣東左布政使

張鵬

按明外史本傳鵬字騰霄涑水人景泰二年進士授御史上疏言懷利事君人臣所戒比每遇聖節或進羊馬錦綺交錯殿廷自非貪賄安有餘財充進奉且陛下富有四海豈藉是足國哉宜一切停罷塞諂諛奔競之途疏凡四事帝頗採用出按大同宣府奏兩鎮軍士敝衣菲食病無藥死無棺乞官給醫藥棺槨設義塚俾饕厲祭死者蒙恩則生者勸帝立報可且命諸邊概行之奏停淮揚徵賦給牛種天順元年全官楊瑄劾石亨曹吉祥鵬亦偕劉泰魏瀚康驥論劾俱得罪下詔獄諸御史多謫官而鵬瑄戍遼東頃之赦免復戍南丹語具瑄傳憲宗立廷臣交薦召復原官尋超擢福建按察使成化四年以右僉都御史巡撫廣西勦蠻寇有功其冬罷巡撫官命還理南京都察院事改督漕

運兼撫淮揚四府尋解漕務專理巡撫事復還南院進副都御史巡撫寧夏召還歷兵部左右侍郎十八年代陳鉞爲兵部尙書守珠池宦官韋助乞往來高肇瓊廉會守巡官捕寇鵬執不可帝竟許之南北印馬率遣勛臣內侍後以災傷止遣御史是年帝復欲遣內侍鵬等執不可帝勉從之命嗣後仍如故事鎮守大同中官汪直言小王子將大舉請發京兵援鵬等言大同士馬四萬足用所請宜勿許而京師控四方必養銳平時臨事乃能禦侮邇者因營造精力銷沮猝有急何以作威厲氣請悉停其役詔可尋加太子少保鵬初爲御史剛直尙氣節有盛名後敝歷中外惟事安靜帝多失德羣小竊柄閣臣萬安劉吉輩專營私鵬循職而已不能有所匡救二十一年星變鵬偕僚屬言傳奉武職至八百餘人乞悉令閒住非軍功毋濫授四方鎮守監槍守備內官非正統間原設者悉宜召還廷臣亦交以請下兵部覆鵬畏中官不敢堅其議帝遂盡留之時論莫不咎鵬奸民章瑾獻珍寶得爲錦衣鎮撫理刑缺鵬所上不允知帝意屬瑾卽推用焉臺諫劾大臣不職者皆及鵬鵬力求去遂賜勅給驛以歸弘治中卒諡懿簡

尙褫

按明外史本傳禡字景福羅山人正統四年進士除行人上書請毋囚繫大臣擢南院御史以劾周銓下獄與他御史皆謫驛丞得雲南虛仁驛景泰五年冬因災異上書陳數事中言忠直之士冒死陳言執政者格以條例輕則報罷重則中傷是言路雖開猶未開也釋教盛行誘煽輿俗由掌邦禮者畏王振勢度僧多至此宜盡勒歸農章下禮部胡濙惡其刺己悉格不行量移豐城知縣爲邑豪誣搆繫獄尋得釋成化初大臣會薦擢湖廣僉事初有詔荆襄流民許所在附籍都御史項忠復遣還鄉督甚急多道死禡憫之陳牒巡撫吳琛請進止琛以報忠忠怒劾禡中朝知其意在卹民卒申令流民聽附籍不願乃遣還鄉爲僉事十年所司上其治行賜誥旌異致仕卒

林聰

按明外史本傳聰字季聰寧德人正統四年進士久之授刑科給事中景帝嗣位進都給事中當是時四方多故聰慷慨論天下事無所諱中官金英家人犯法都御史陳鑑王文治之不罪英聰率同列劾鑑文畏勢縱奸并及御史宋璫謝琚皆下獄頃之復職聰又言璫琚不任風紀二人竟調外汪后父都督泉縱家人占民田六十餘頃聰等劾下家人獄還田於民中官善增督京營有寵宮室輿

馬如王公朝士稍忤輒遭辱家奴白晝殺人奪民產侵商稅聽白發其奸下增詔獄雖獲宥然卒不敢肆景泰三年春疏言臣職在糾察刑獄妖僧趙才興疎族百口律不當坐而抄提至京叛人王英之兄律不當逮家屬而俱配流所雖終見原然其始受害已不堪矣湖廣巡撫蔡錫以劾副使邢端爲所許繫獄經年而端猶居職侍郎劉璉督餉侵隱不爲無罪然較之沈固周忱乾沒萬計孰爲重輕璉下獄追徵而周忱不問犯人徐南與子中書舍人頤俱坐王振黨當斬乃論南大辟頤止除名此皆刑罰之失平者帝是其言端下獄璉得釋南亦減死除名東宮改建以聽初有異論特遷春坊司直郎明年春學士商輅言聰敢言不宜置散地乃改吏科都給事中上言奪情非令典請永除其令帝納之初正統中福建銀場額重民不能堪聰恐生變請輕之時弗能用已果大亂及是復極言其害竟得減免五年三月以災異偕同官陳八事帝多採納之吏部除副使羅篋爲按察使參政李輅僉事陳永爲布政使聰疏爭之并言山西布政使王瑛老宜罷篋等遂還守故官瑛致仕御史白仲賢以久次擢廣東按察使聰言仲賢奔競不當超擢乃遷鎮江知府兵部主事吳誠貴緣得吏部聰劾之遂改工部諸司憚聰風裁聰所言無敢不奉行吏部尤甚而內實疾之內閣及諸御史亦並

以聰好論建弗善也其年冬聰甥陳和爲教官欲得近地便養聰爲言於吏部御史黃溥等遂劾聰專制吏部下廷訊坐專擅選法論斬高穀胡濙力救帝亦自知聰止貶國子學正天順初超拜左僉都御史出賑山東饑活饑民百四十五萬還進右副都御史捕江淮鹽盜指揮吳歛等受盜賂奏籍其家戮盜魁數人餘悉解散母憂起復再辭不許曹欽反將士妄殺報功都下乞兒多失其首市人不敢出戶聰署院事急令獲賊者必生致濫殺爲止錦衣官校惡欽殺指揮遂杲悉捕欽姻識千戶龔遂榮欽外舅賀三亦在繫中人知其冤莫敢直聰悉辨出之他湔雪者甚衆成化二年淮南北饑聰出巡視貸漕糧及江南餘糧以賑民德之如山東進右都御史七年代王越巡撫大同歲餘遇疾致仕十年以故官起南院都御史多不樂御史言事聰獨獎勵之曰己不能言又禁他人言可乎久之召拜刑部尙書尋加太子少保聰以舊德召用持大體秉公論不嚴而肅時望益峻遼東巡撫陳鉞鎮守中官葉達聰兵官歐信等屢失事被劾詔聰與中官汪直定西侯蔣琬按之直欲庇鉞而憚聰深敬禮以悅其意聰亦稍委蛇比具獄還達信及副將韓斌等十七人並貶秩奪俸而鉞獨逃罪論者深爲聰惜十八年乞歸不得卒於位年六十八贈少保諡莊敏聰爲諫官獄獄敢言嚴重不可

犯而實和易不爲嶄絕之行以故不肖者畏之賢者樂就焉當景泰時士大夫激昂論事朝多直臣由聽倡也

康永韶 胡深 鄭己 董旻

按明外史魏元傳康永韶字用和祁門人舉於鄉入國學選授御史成化初巡按畿輔劾尙書馬昂抑市民地四年偕同官胡深鄭己等爭慈懿太后山陵事彗星見復偕同官上疏言大本未立異端太盛進退賞罰未公財用工役未省賑濟無策備禦無方凡八事大旨與元疏相類帝亦優詔答之翌日同官胡深陳宏鄭己何純方昇張進祿復上疏請帝斥邪奸痛詆學士商輅兵部尙書程信禮部尙書姚夔戶部尙書馬昂謂此數人致天譴帝不納翌日早朝給事中董旻陳鶴胡智亦劾輅等疏呈御前故事諫官彈章非大廷宣讀則封進未有不讀而面呈者帝不悅曰大臣進退有體旻等敢不循舊章亂朝儀耶輅等乞休帝惟聽昂去夔憤甚連疏求去旻深等復合詞攻而詆夔尤甚帝怒下旻等九人獄會御史林誠亦嘗劾輅引病乞歸帝并屬誠吏給事中毛弘等論救輅亦請寬之乃各杖二十復其官帝既納元永韶疏命兩京大臣考察庶寮而去留多不當永韶等復劾大臣行

私且摘刑部主事余志等十二人罪請并奪職帝不從但命不稱者考滿日奏黜志秩滿懼失官上章自辨且許永韶及御史馮徽吳達奸利事永韶等亦許辨不已俱下詔獄先是徽達語給事中蕭彥莊聞上欲自除兩京大臣我輩將言其不便請仍歸吏部彥莊劾尙書李秉遂以其語聞帝銜之至是獄具言諸所許皆虛惟徽達語實乃調永韶志外任貶徽達州判官永韶得順昌知縣再調福清惠安久之有薦其知天文者中旨召還授欽天監正進太常少卿掌監事永韶爲御史有直聲及是見帝惑左道權倖用事乃更迎合取寵占候多隱諱甚者以災爲祥陝西大饑永韶言今春星變當有大咎賴秦民饑死足當之誠國家無疆福帝甚悅中旨擢禮部右侍郎仍掌監事坐曆多訛字落職歸深定遠衛人嘗按陝西諸大臣旣被劾惡深未幾坐以按陝時杖殺訴寃者謫黔陽丞稍遷鬱林知州卒己山海衛人六年巡按陝西請蠲邊地逋賦而分別邊兵令壯者戰守老弱耕牧章下所司定西侯蔣琬鎮甘肅己欲按其罪語洩爲所劾戍宣府琬有內援己又大臣所忌也然己性矜傲時論不甚惜髮樂平人進吏科都給事中爲吏所許下詔獄謫石臼知縣孝宗時卒官四川參議

姜昂

按明外史本傳昂字恆顯太倉人成化八年進士除棗強知縣授御史偕同官劾方士李孜省杖午門外以母老乞改南尋出爲河南知府吏白事畢退闔門讀書鞭筆懸不用藩府人有犯立決遣之改知寧波擢福建參政請終養歸服闋而卒昂在官日市少肉供母而自食菜茹子弟學書不聽用官紙筆家居室不蔽風雨子龍另有傳

陳壯

按明外史本傳壯字直夫其先浙江山陰人祖坐事謫戍交趾後調南京衛遂家焉壯舉天順末進士授南京御史編修章懋等建言得罪抗疏救之帝遣中官采花木復疏諫尙書陳翌請以馬豆代百官俸壯言飼馬之物不可養士大夫事乃寢壯家素寒常祿外一無所取父母歿廬墓側居喪循古禮歷江西僉事致仕歸家居十餘年弘治中以尙書張悅薦起官福建居二年又乞致仕時倪岳爲吏部素賢之擢河南副使歲荒賑饑民懷其惠僉都御史林俊謝病舉以自代未及遷而壯又乞致仕巡撫孫需奏留之又二年竟致仕去

強珍